



ATASSUT

UKA 2016/44&138-1

Siverth K. Heilmann

05. 10. 2016

Nunarput tamakkerlugu kommunit suleqatigalugit angerlarsimaffeqanngitsunut angerlarsimaffiugallartussanik 100-nik sanaartornissaq qulakkeeriarlugu siunnersuummik aningaasaleeriaatsimik imaqartumik kingusinnerpaamik UKA 2017-imi Naalakkersuisut saqqummius-sinissaat pillugu Inatsisartuni aalajangiiffigisassatut siunnersuut.

(Inatsisartunut ilaasortaq Mimi Karlsen, Inuit Ataqagiit)

Aammalu

Utoqqarnut sammititanik siunissami pisortat sanaartortarnissaannut aaqqiissutissamik innersuussisumik Naalakkersuisut kingusinnerpaamik UKA 2017-imi nassuiaammik saqqummiussinissaannik Inatsisartuni aalajangiiffigisassatut siunnersuut.

(Inatsisartunut ilaasortaq Ane Hansen, Inuit Ataqatigiit)

Siullermut tunngatillugu tassalu Inatsisartunut ilaasortap Mimi Karlsen, Inuit Ataqatigiit aalajangiiffigisassatut siunnersuutaanut imatut ATASSUT-miit oqaaseqarfigissavarput.

Nunatsinni innuttaaqatigiit ilaat angerlarsimaffeqanngitsuuneranik akuersaaruminaatsuuneralu tunngavilersuuteqarneq ATASSUT-ip isumaqatigilluinarpaq. Soorunami kissaatiginaqaaq, inuit tamavimmik pinngitsooratik angerlarsimaffeqarnissat, tamanna inuit qinigaattut kommuune-mi nunalu tamakkerlugu sulinermi anguniagaasaralarpoq.

Siunnersuuteqartup tunngavilersuutimini ajornartorsiutaasunik tikkuartugai ilumoortortalerujussuilu tamaasa uteqqinngikkaluarlugit, ilassutitut makkua patsisaapput, inissaqarnissaq qulakkeeqqaar-nagu illoqarfimmut allamut nuuttoqartarnera, aappariinnerup iluani qimanneq, ineqareeraluarlutik akissarsiorluartut akiligassaminnik sumiginnaasarnerat, sulisinnaasut sulinissaminnut piumassu-

saasa annikittarnerat, suliffissaarunnermi pisortaniik tunineqaannartarnerup taamaaginnartussatut isigineqalertarnera kiisalu uersakkanut allarpassuarnullu pisortanut il.il. akiitsorpassuaqalertarneq, tulleriaarinernullu akissaaruttarneq.

Qularutigineqassanngilaq ATASSUT-miit pingaartilluinnaratsigu, kikkut tamarmik sulisinnaasut suliffeqalernissaat aningaasarsiornissaallu, nammineq imminut ilaqtariittullu pilersornermikkut toqqissisimanartumillu ineqalernissaamut aqutissiuussuarnissaq siunertaralugu. Tamannalu sallerpaatut anguniarneqartuartaqarpoq. Ikiugassat inatsit malillugu pisortaniik isumagineqarnissaat pingaaruteqarluinnarpoq avaqqunneqarsinnaananilu.

ATASSUT-miit inuit angerlarsimaffeerunnikut, pingaartumik maani Nuummi amerlaqisut, Naalakkersuisut Kommuune-lu suleqatigalugit illut pioreersut atorluarneqarnissaannik inassuteqareerpugut, soorunalumi aamma illoqarfinni allani ajornartorsiuttip minnerpaaffissamiitinneqarnissaa anguniarlugu suleqatigiinneq paaseqatigiinnerlu pikkoriffiginerusariaqarparput.

Nunarput namminiilivinnissamik innuttaasunik amerlanerussuteqarluartunillu kissaatigineqareersoq ajornartorsiortoqalersorlu, Kommuunet Namminersorlutillu Oqartussat, tamatigut sanaartortitsialissagut akissaqarpugut ?

ATASSUT-miit isumaqarpugut, angerlarsimaffeqanngitsunut angerlarsimaffiugallartussanik 100-nik kisitsisitalereerlugit nunatsinni sanaartortoqarnissaanik aalajangiisitsiniarneq pingaarnerpaajungitsoq. Pingaarnerpaavorli kommunit suleqatigalugit qanoq pisariaqartitsineq annertutiginersoq pillugu 2017-ip ukiaanerani Naalakkersuisut saqqummiussaqaqarumaarnissaat.

Siunnersuuteqartumiit inatsisartuniillu, qulaani oqariartuutigisatta aalajangiiffigisassap allanngualatsinneqarsinnaanera ammaffigineqarpat ATASSUT ataatsimiititaliamut susassaartumut ingerlattinnissaanut. Taakkuupput uunga suliassamut ATASSUT-miit oqaatigiumasagut.

Inatsisartuni ilaasortap Ane Hansen, Inuit Ataqaatigiit, utoqqarnut sammititanik siunissami pisortat sanaartortarnissaannut aaqqiissutissamik innersuussissumik Naalakkersuisut kingusinnerpaamik UKA 2017-imi nassuiaasiornissamik siunnersuutaanut tunngatillugu imatut naatsumik ATASSUT-miit oqaaseqarfigissavarput.

Qularnangilaq kommuunet ilaanni aningaasakilliorneq imaluunniit utoqqaat illuliornissamut, utoq-qarnullu sapinnginnerusunut inissialiortitsinissamut salliutitsinnginneq pissutaalluni, utoqqaat isu-magineqarnerannut ineqarnissaannullu kinguleruuttoqarsimassaaq. Sanaartornissamut aningaasalee-qatigiinnissamullu Kommunnit 1. Marst-iutinnagu kissaatititik pisarneq malillugu Namminersorlu-tik oqartussanut nassiutereersimasussaavaat.

Taamatut siusinaartumik kissaateqartarneq aningaasaleeqataaffigissallugillu nalunaaruteqareertar-neq piviusorsiornerpaavoq aammalu tassaniilluni nammineq kommuunerisami pisariaqartitsineq qanoq annertuginersoq. Tamanna uvagut Qeqqata kommuune-ani utoqqartatta amerliartornerat ili-simaarilluaratsigu pisariaqartitsinerlu aallaavigalugu aningaasaleeqatigiittarnigut ajunngivissumik utoqqaat peqatigiiffii suleqatigalugit ingerlanneqarpoq.

Ilisimalluarparput Kommuune-ni aningaasakilliorartoqartillugu sanaartugassanik kissaatit ilanngullu-git Naalackersuisoqarfinnut ingerlanneqartartut, taamaalillunilu kommuunet sanaartortitserusunner-mikkut kissaatiminnik salliutitaminnik nalunaarsugaat ilisimaneqareertarlutik. Aperisoqarsinnaavoq Naalackersuisunut nassuiaasiortitseqqaanngikkaluarluni attaveqatigiinnerit ingerlasareersut eqaalli-saannarneqarsinnaannginnamiik?

Tamatut ATASSUT-miit oqaaseqarluta siunnersuut ilalinngilarput.